



24. September 2019

UKA 2019/7
Aqqalu C. Jerimiassen

2020-imut aningaasanut inatsisissatut siunnersuut.

(Aningaasaqarnermut Naalakkersuisoq)

Ilalimi kaasarfiipput imaattuittuuppat qanoruna nuannertigissagaluarpa. Piviusorli allatut ajornaqaaq, aningaasaqarnerput atugassarititaasut aqqani malillugu pitsaanerpaasorisamik inissiiniartariaqarpugut.

Tamannalu pillugu Aningaasaqarnermut Nunanilu Avannarlernut Naalakkersuisoq nersortariaavoq suliarujussuarmik saqqummiussineranut, nunatta aningaasaqarnerata qanoq siunnerfeqarsinnaaneranut.

Ukiut maanna atorpagut isumalluarfiup aqqani, tassami imatut paasissuarput, mittarfiit nutaat pingasut sananeqarnissaannut innuttaasunut isumallualersitsinermik siunnerfilimmik maanna isertuunneqarsinnaanngitsumik ingerlalersimavugut. Tassami avataanit aningaasaleerusussuseq qaffariartulersimammat, malitsigisaanillu suliffissanik nutaanik puttussuuttoqaleriartornissaa tullinnguukkaluttuurtutut ilingaluttuinnarluni. Eqqaamasassaqaarpugullu pingaaruteqarluinnartumik, maanna inooriaaserput malunnaatilimmik allanngoriartoqataatittariaqarparput aningaasarsiornikkut ilorraap tungaanut ingerlaqataanissaq isumalluaannarnermiisinnagu suleqataaniarnitsigut. Uagummi tassaavugut innuttaasut sulisussat, aningaasaq nammineq iserunnangimmat mittarfiit pilernerisigut. Taamaammat maannangaaq tassa piffissaavoq sulingasuarluta aallartinnissarput.

Atassummiik nuannaarutigaarput Naalakkersuisut saqqummiussaminni utoqqaat illersuisoqalernissaanut suliaq pimoorullugu suliassani ilanngussimammassuk, taamatuttaarlu utoqqalinersialittatsinnut aningaasarsiaqarnikkut nalimmassaanissaq saniatigut isertitaqarsinnaaneq eqqarsaatigalungu naammagisimaarinngingaarluta taasinnaavarput.

Inuiaqatigiinni toqqissisimalluni inuunissaq pingaartuuvoq, tamannalumi pillugu peqqinnissaqarfitta ukiuni tulliuttuni naalagaaffeqatigiinnerup iluani suleqatigiinnikkut naalagaaffimmut utertinneqarsinnaanera eqqartussallugu pingaaruteqarpoq. Nunami isorartooruarmiinnitta assigiinningsorpasuarnik pitsaaqutinik tuniorartuaraluaaratigut assiganissaq unammillernartut malinnaaqataasarput, Atassummiillu maannamut peqqinnissaqarfitta nunatsinnut angerlaanneqarsimanera piniataarpallaarsimasutut taarusullugu. Aallaqqaataaniik eqqarsaatigeqqaarneqarsimasinnaasussaagaluarimat aningaasatigut nunatsinnut siunissamut iluaqutigisinnaasatta tiguneqarsimasinnaangaluarneri, tamassuminngalumi toqqammaveqarpoq inuussutissalerinermut aqutsiveqarfiup nunatsinnik nammineq ingerlanneqalernissaanut suliamik Atassummiik aallartitsisimanitsinnut.

Atassummiik qujarutingaarparput upaluangaarsimanermut tunngatillugu aningaasaliissutit qaffariaateqartinneqarsimaneri, tamannali ersarissumik tikkuussinertariaqartoq Atassummiik



sakkortuumik tikkuarusupparput! Qaffariaateqartitsinerup malitsigisaanik upalungaarsimanerup suliaqartuusut attaveqaatitigut suleqatigiiffiulluurtumik annertuumik piumasaqaatitalimmik sulinissaannik piumasaqarfigisariaqarpagut, ukiullumi tulliuuttut tamaasa takusinnaajuartariaqarparput qanoq upalungaarsimaneq pillugu angusaqartoqarsimaneq, qanorlu annertutigisumik pisoqarsinnaagaluarneranik iluaqutsiisimaneq.

Inuussutissarsiorneq pitsaasoq inuiaqatigiinni qitiussaaq. Aalisarneq, aalisarneq ilalumi suli aalisarneq nunatsinni aningaasarsiuuttut isumalluutaajuartut nammattoriuarparput, tamassumalumi nunatta ingerlarna pissanganalaartumiittuarneranik kinguneqarpoq. Partiinik allarpassuarnik utikulunneqartaraluaqaaq aalisarneq kisiat siunissamut isumalluutigisinnaangikkipput nunatta aningaasaqarnerani, piviusorli tassa ullumikkut taamaappoq, qanorluunniit ukiuni tulliuuttuni aammattaq suli isumalluutiguarallassuarput nunatta aningaasaqarnerata ingerlaannarsinnaanerani. Pisuussutit uumaatsut atorluarneqaleriartornissaanik qaatunninniilli eqqartuinerit ukiut 30-it suli sinnilaarnerini tusaavakka eqqartorneqartut, tamannaangitsorli, tassami nammineq suliniartarnerigaluatta kigaannerujussua pequtaanerutillugu nunatsinni pisuussutinik uumaatsunik ingerlataqalerianeq ukiorpassuarni tassaneerusaaginnapajaartut isikkoqarsimavoq (taamaangilamilluunniit oqartoqaraluarpat).

Inuussutissarsiuuttit allat takornariaqarnerup avataaniittut nunarsuup sinneranit isiginiarneqaleraluuttuinnartut ilagaat sersersuatta aattorneranit imipiluunersuaq kuinnartoq atorluarneqaaqatoqisoq. Atassummiillumi tusarluarneqarparput nuannaarutigalugulu maanna atuisinnaanermik qinnuteqaateqarsimasut malunnaatilmik qaffariartorneri, ilatormi ukiorpassuarni sinnattuinnajuarsimasoq kiisami nunatta iluamik iluaqutigileriliuk. Sermip erngullu tunisassiarineqarnissaanut periusissiaqalersimaneq pitsaasumik Atassummiik maluginiarparput, tamannalu naalakkersuisunut nersualaarutigerusullugu.

Takornariaqarneq, amerlatsikkaluttuinnarunarpugut inuusunnerumaartut nunatta takornariaqarnerata iluani toqqaannartumik suleqataasusugut namminersortutut ingerlataqarluta. Takornariaqarnerup nunatta iluani aningaasarsiornekkut pingaaruteqaleraluuttuinnarnera tamanut malunnaatilmik ingerlavoq. Atassummiilli oqaatigisariaqarparput erseqqissumik, takornarissanut tikittartutsinnut “ajunggippallaarpugut ajuusaarpallaarluta”, takornariaqarnermik suliffeqarfiit isertittagaat aqutugalugit isertitaqarnissarput kisiat siunnerfigiunnaarlugu toqqaannartumik takornissaniik nunatsinnut tamarmut iluaqutaasumik isertitaqartalernissarput inissaminiittariaqalerpoq ukiut isumalluarfiit aqqani. Takornarissat amerlatsikkiartuaarnerata aqqani nunatsinni akileraartuusugut kisitta akisussaatinneqassanngilagut takornarissat amerlatsinnerisa aqqani innarlerneqarsimasunik aqqissuinissamik, tamanna tikittartut kaasarfiinik aaneqartariaqarpoq, tamannarpiaavorlumi ukiaq manna Atassummiik imm.86 oqaluuserisassanngorsimaneq.

Sanaartorneq siunissami akissaqarfigiartuaarnerulernissaa eqqarsaatigalugu Atassummiik pingaartitariuarparput kikkut tamarmik toqqissimasumik angerlasimaffeqarsinnaanissaat. Soorunami oqaannarluni ajornanneqaaq, namminerli illuutitaarsinnaaneq eqqarsaatigalugu nunatsinni naalakkersuinikkut pisariaqalerunnarsigaluarpoq suliarissallugu inissiat ukiorpassuarni inoqutigiinnik najugarineqarsimasut qasseriaagaluarnerneq imminnut akilereersimasut pigilivinneqarsinnaaneritut attartortuinik misissuisitsilernissaq periarfissamik. Akisussaaffiillu iperariartuaalernerisa malitsigisaannik, inissianik nutaanerusunik nunatta sinnerani inoqarfinni



minnerumaani sanaartorerup eqaannerusumik ukiuni tulliuttuni ingerlanneqaleriartorsinnaaneranut periarfissanik ammasuusinnaammat. Atassummiik ataatsimiitsitaliap siullermeerinninnermi sulilluarnissaanik kissaapparput, neriullutalu angusaqarfiulluatumik suliarineqarumaartoq.